



Komunikadu Imprensa
Munisípiu Ermera
09 Feveireiru 2024

JSMP kontinua asina Nota Entendimentu ho Suku Samalete ba Programa Apoiu Seguransa Komunitáriu (PASK)

Iha 01 Feveireiru 2024, JSMP Asina Nota Entendimentu ka *MoU* ho Suku Samalete, Postu Administrativu Railaku, Munisípiu Ermera. Nota Entendimentu ne'e estabelese entre parte rua ho objetivu atu kontinua asegura komunikasaun no koordinasaun ne'ebé di'ak entre parte rua durante implementasaun Programa Apoiu Seguransa Komunitáriu (PASK) no mós bele asegura katak atividade sira ne'ebé mak hala'o ne'e tuir duni objetivu programa ne'e rasik.

“agradese tebes ba iha xefe suku ho estrutura tomak ne'ebé durante tinan ida nia laran koopera di'ak tebes iha Programa Apoiu Seguransa Komunitáriu (PASK) no liuhosi parte rua nia kolaborasaun ne'e konsege responde buat balun tuir atividade sira ne'ebé konkorda hamutuk ona. Lori JSMP nia naran, hakarak nafatin agradese ba konfiansa nune'e ohin loron bele asina tan nota entendimentu ba kontinuasaun serbisu hamutuk iha programa hanesan iha futuru nune'e comunidade sira bele asesu ba justisa tantu iha nível komunitáriu no nasional,” dehan Sra. Ana Paula Marçal, Diretora Ezekutiva JSMP.

Iha parte seluk, Xefe Suku Samalete, Sr. Antonio Filipe dos Santos, iha ninia intervensaun hato'o agradese bo'ot tebes ba JSMP, tanba bele kontinua hala'o programa ne'e iha nia suku no liuhosi asina *MoU* ohin loron prontu atu kontinua kolabora ho JSMP iha futuru tanba konsidera programa ne'e importante tebes.

Xefi suku konsidera prezensa JSMP nian liuhosi programa ne'e durante tinan ida nia laran iha tinan 2023 hetan rezultadu pozitivu tebes tanba hosi programa ne'e iha suku Samalete iha tinan 2023 número kazu krime menus inklui violénsia doméstika kompara ho tinan sira antes mezmú ema hotu konsidera katak Suku Samaletete nu'udar suku ne'ebé número krime as iha Ermera no nu'udar área konfliktu.

Xefe suku kontinua subliña katak programa ne'e importante tebes tanba ho objetivu atu fasilita comunidade sira bele asesu informasaun relasiona ho sira nia kazu, fahe informasaun Lei nian ba comunidade hodi kompriende, hadia regra Tara-Bandu hodi nune'e la kontra Lei formál inklui liuhosi programa ne'e bele fó hanoin no ajuda estrutura suku bele rezolve problema disputa sira iha suku laran.

Reprezentante TAF/PASK, Sra. Eurosia Maria de Fatima Almeida iha nia intervensaun haktuir katak TAF/PASK sei kontinua apoiu JSMP hodi implementa programa ne'e no atu programa ne'e nafatin kontinua hetan apoiu kontinuaun husu ba autoridade lokál sira atu bele kolabora ho JSMP hodi bele implementa atividade ne'e ho susesu.

Entretantu Segunda Komandante Eskuadra Railaku, Sra. Armenia M. Tavares, iha nia intervensaun haktuir katak nia parte, maski foin mak akompaña programa ne'e, maibé PNTL Eskuadra Railaku prontu apoiu programa ne'e tanba konsidera importante tebes bele ajuda no halo kmaan ona polisia nia serbisu.

Segunda Komandante ne'e hatutan katak uluk kedas krime iha Suku Samalete número aas iha Postu Administrativu Railaku, maibé agora número kazu menus tebes no ida ne'e hatudu comunidade no joven sira iha ona konsiénsia atu la halo krime tanba hetan ona informasaun kona-ba Lei sira bandu atu halo krime hodi bele harii pás iha suku.

Programa ne'e ho nia objetivu mak atu tulun comunidade lokál sira no interveniente sira iha sistema justisa nasional hodi hadi'ak ligasaun entre sistema sira no mós hadi'ak justisa ida ne'ebé justu no ema hotu-hotu bele asesu iha nivel komunitáriu, ho atividade sira mak hanesan:

1. Observa prosesu rezolusaun disputa komunitáriu no hala'o peskiza lokál
2. Fornese informasaun hodi tulun halo revizaun ba iha Regra Tara-bandu
3. Fahe informasaun kona-ba progresu kazu sira hosi polisia tribunál, prokuradoria ba iha suku sira tarjetu
4. Advokasia atu hadi'ak liután ligasaun comunidade sira ho justisa formal
5. Fahe informasaun kona-ba asesu ba sistema justisa formál
6. Sei introdus Case Log ba Konsellu suku sira no OPS kona-ba oinsa atu priense formulariu kazu sira

MoU ne'e asina hosi Xefe Suku Samalete no Diretora Ezekutiva JSMP no akompaña hosi Inspetora Sra. Armenia M. Tavares, nu'udar Segundu Komandante PNTL Eskuadra Railaku no Sra. Eurosia Almeida, nu'udar representante TAF. Alende ne'e, hetan akompaña mós hosi xefi aldeia, lianain, representante KPK, OPS no delegada fetu ho mane hosi Suku Samalete.

Atividade ne'e, realiza hosi JSMP, liuhosi Programa Apoiu Seguransa Komunitária (PASK) tanba serbisu hamutuk ho The Asia Foundation (TAF) ne'ebé Finansia hosi Embaixada Nova Zelândia iha Timor-Leste.

Atu hetan informasaun kompleitu, favór kontaktu:

Ana Paula Marçal
Diretora Ezekutiva JSMP

Diresaun e-mail: ana@jamp.tl

Telephone: (+670) 33238883 | 77040735

Website: <https://jamp.tl>

info@jamp.tl